

## Pyaar Kā Ahad

**Taurait : laadā 7:9-12, 8:1-5, 31:24-29**

Musā<sup>(a.s)</sup> ne logoñ se kahā, “Yaad rakho ki Allaah rabbul azeem sirf ek hī hai. Wo apne kare hue waade ko hameshā purā kartā hai aur apne kie hue ahad ko hazaar nasloñ tak yaad rakhtā hai. Wo ye sab un logoñ ke liye kartā hai jo usse mohabbat karte haiñ aur uskā kahnā maante haiñ.<sup>(9)</sup> Lekin jo log Allaah taa’alā se nafrat karte haiñ wo barbaad kar die jaate haiñ kyuñki wo unko sazā dene me hichakichaata naheen hai.<sup>(10)</sup> Islie k̄hyaal rakhnā ki uske hukm aur usuloñ ko maano jo main āj tumheñ batā rahā huñ.<sup>(11)</sup> In qaanunoñ par ġaur karo aur in par dhyaan se amal karo, tabhī Allaah taa’alā apne ahad ko yaad rakhegā jo usne tumhaare baap-daadā se kiyā hai.<sup>(12)</sup>

### 8:1-5

[Phir Musā<sup>(a.s)</sup> ne un se kahā,] “Dhyaan se har hukm par amal karnā jo main tumko batā rahā huñ, tabhī tum log barkat paaoge. Tum tabhī us zameen ke maalik ban sakoge ki jis kā waadā Allaah taa’alā ne tumhaare buzurgoñ se kiyā hai.<sup>(1)</sup> Yaad rakhnā ki Allaah taa’alā ne kis tarah chaalees saal tumheñ registaan me bhatkayā aur tumhaare ġurur ko k̄hatm kar diyā. Usne tumhaarā imtihaan liyā taaki wo tumheñ parakh sake. Allaah taa’alā jaannā chahtā thā ki tum uske hukm par amal karte ho yā naheen.<sup>(2)</sup> Usne tumheñ narm karne ke liye tumheñ bhukh kā ehasaas dilaayā aur phir khaane ke liye mann<sup>[a]</sup> naamak ek āsmaanī roṭī dī. Mann ek aisā khaanā thā jo tumne aur tumhaare baap-daadā ne nā kabhī dekhā thā aur nā hī kabhī sunā thā. Is tarah se, Allaah taa’alā ne tumko sikhaayā ki insaan sirf roṭī se naheen zindā hai balki Allaah taa’alā ke har kalaam me zindagī hai.<sup>(3)</sup>

“In chaalees saaloñ me, nā hī tumhaare kapḍe phaṭe aur nā hī tumhaare paioñ me sujan āī.<sup>(4)</sup> Tum apne diloñ me ye baat baiṭhā lo ki jis tarah ek baap apnī aulaad kī ġaltiyaan sudhaartā hai usī tarah se Allaah rabbul azeem ne tum logoñ ko bhī sudhaarā hai.”<sup>(5)</sup>

---

[a] Quraan Majeed : Al-Baqarah 2:57